

Qalampirning tanqidi asossiz

Qalampirning tanqidi **asossiz**. Vazirlar Mahkamasining 2021-yil 10-fevraldag'i "Lotin yozuviga asoslangan o'zbek alifbosiga bosqichma-bosqich to'liq o'tishni ta'minlash chora-tadbirlari to'g'risida"gi 61-sonli qarori ijrosini ta'minlashga qaratilgan Hukumat rahbarining ko'rsatmasi kuni kecha vazirlik, idoralar va tashkilotlar hamda hokimliklarning rahbarlariga yetkazildi.

Topshiriqqa asosan 2021-yil 1-avgustga qadar mamlakatdagi barcha joy, ko'cha, atamalar, tashkilotlarning nomlari, peshlavhalar, ommaviy targ'ibot vositalari, reklamalar va e'lonlar, shuningdek, ish qog'ozlari va turli blanklar lotin yozuviga asoslangan o'zbek alifbosida bo'lishini ta'minlash vazifasi belgilandi.

Bu haqiqatan, Hukumatning davlat tili bilan bog'liq islohotlarni amalga oshirishdagi yana bir muhim tashabbuslaridan biri deb baholasa bo'ladi. Topshiriq qaror bilan mustahkamlangan, uni ijrosi ham o'z vaqtida ta'minlanmoqda.

Qalampir.uzning tanqidi o'rinsiz. Sababi qarorda aniq belgilab qo'yilgan, ya'ni tashkiliy-huquqiy shaklidan qat'i nazar, barcha tashkilotlarda ish yuritish hujjatlari va boshqa hujjatlarni lotin yozuviga asoslangan o'zbek alifbosida ishlab chiqish, qabul qilish va e'lon qilish amaliyotini to'liq joriy qilish 2023-yil 1-yanvardan boshlab joriy etiladi.

Bosh vazirning 2021 yil 1 iyuldag'i topshirig'ida quyidagilar lotin yozuviga asoslangan o'zbek alifbosida bo'lishi ta'minlanishi kerakligi ta'kidlangan:

- * barcha joy va ko'cha nomlari;
- * atamalar;
- * tashkilotlarning nomlari;
- * peshlavhalar;
- * ommaviy targ'ibot vositalari;
- * reklama va e'lonlar;
- * ish qog'ozlari va turli blanklar.

Demak, Hukumat o'z maqsadi yo'lida qat'iy turmoqda. Lotin yozuviga asoslangan o'zbek alifbosiga o'tish bosqichma-bosqich amalga oshirilmoqda. Agar qalampir haqiqatga teranroq qaraganda edi, Bosh vazirning topshiriq blankasini lotin yozuviga asoslangan o'zbek alifbosida ekanligini bilgan bo'lardi.

Sherzod Xolmatov